

Parke Nacional Arikok ta tene sesion pa monitor, segun Indra Zaandam

Ainda no por bisa si ratonnan di anochi a aumenta



ORANJESTAD – Un bi-aha mas ranger nan di Parke Nacional Arikok ta tene nan sesion di monitor e ratonnan di anochi. Den e cueba di Guadirikiri unda tin e ratonnan di anochi cu ta come insectonan, esaki ta su temporada cu e mamanan ta carga nan yiunan chikito. Esaki ta pone cu nos ta haya e ratonnan di anochi specialmente den e camber patras di e cueba caminda cu nan ta busca refugio, pero tambe esaki ta nan cas. No por bisa ainda si e cantidad di ratonnan di anochi a aumenta of baha compara cu aña pasa. Despues di haci e sesion di monitor nan, lo por tin un bista miho.

Te aworaki pa por bisa con hopi raton di anochi por tin actualmente, Indra Zaandam di Parke Nacional Arikok no por bisa. Na e momentonan aki Parke Nacional Arikok ta den e sesion di monitor e ratonnan di anochi. Diabierna na Tunnel of Love a moni- tor e ratonnan di anochi y diadomingo a haci esaki na Miramar, y awo ta e turno di Guadirikiri, segun Indra Zaandam di Parke Nacional Arikok. Haciendo esaki e rangeman di Parke Nacional

Arikok por tin un miho indicacion si e cantidad di ratonnan di anochi a aumenta of no.

COMPARA DATONAN DI 2012 Y 2013

Segun Zaandam, den luna di Juli nan a haci e sesion aki. Momento cu a compara e datonan di aña pasa di e mesun luna, nan a spanta un tiki pa motibo cu e cantidad di ratonnan di anochi a baha drasticamente. E rangeman a cuminsa pensa kico por ta e motibo cu e cantidad a baha, pero mas cu claro naturalesa



tin su variacion. Porta cuater aña poblacion di un animal por comporta nan mes di un tal manera, y despues nan ta comporta otro manera, segun Zaandam.



CANTIDAD DI 2013 TA MENOS

Posiblemente algo otro por ta causando e bahamento di e poblacion, e ta sigui bisa. Porta e bishita frecuente of porta e cueba no ta wordo mira como luga di maternidad mas apropiada, y tur esakinan ta loke e rangeman a cuminsa pensa. Comparando e datonan di Juli 2012 y 2013, e cantidad di ratonnan di anochi no ta mescos, Zaandam ta sigui bisa. E cantidad di ratonnan di anochi den luna di Juli 2013 ta menos.

SEMPER LO TIN RETO

E cueba di Tunnel of Love a wordo cera cual ta e cueba mas gusta na Aruba. Hopi turista ta pasa ey banda pero nan no por dreña, pa motibo cu e cueba aki a wordo cera pasobra el a bira cas di e ratonnan di anochi. Si sigui bay den e otro cuebanan cu ta wordo bishita pa turista, no por bisa si lo cera nan. Segun Zaandam, semper lo bay ta un reto pa e Parke ta cu e rangeman kier pa hendenan yega na e Parke, wak e naturalesa y disfruta di dje, pero tambe sin laga afo e cuebanan. Zaandam ta kere cu ta e momento pa siña y bin cu solucion. E solucion mester ta asina cu tur



hende por bin parke y recrea, pero no mester bay na costo di e recursonan natural manera e ratonnan di anochi.

PENSANDO NA BIENESTAR DI PARKE

Na e momentonan aki nan mes ta pensando na bienestar di e parke, ta cu nan ta bay purba wak si por controla tur esaki mas miho. Antes no tabata tin un ranger para na e cueba di Guadirikiri, pero e biaha aki si nan lo haci esaki caminda cu e ranger por duna informacion y bisa esunnan cu ta dreña den cueba pa ta mas keto, controla e gruponan y no ta dreña cu gruponan grandi di mas o menos 30 hende. Tin borchí poni cu ta splica kico

ta pasa den e cueba y cu Parke Nacional Arikok ta purba di conserva esaki.

HENDENAN TA HUMA DEN CUEBA

Lamentablemente den e ultimo tempo rangeman a haya hendenan ta huma den e cueba, y pa e motibo aki lo pone borchí di no huma. E idea ta pa hendenan yega y wak e cuebanan pa e bunitesa di e naturalesa di Aruba, pero tambe pa conserva nos naturalesa. Segun Zaandam, nan kier haci esaki door di tin mas control. Kisas ora cu e parke cera, tambe por cera e cuebanan, e ta sigui bisa. Den e caso aki pa e cuebanan keda habri pa accesibel pa tur hende, especialmente Guadirikiri. □

Ta busca Enfermera

(verpleegkundige diploma)

Pa cuida pashent na cas.

Fabor tuma contacto cu Katrin

Telephone: 585-6851

Cellular: 594-8550

E-mail: kzehl@hotmail.com



"FAVI FUNDACION CU VISION"